

Penyampai : DATIN SERI DR. SITI HASMAH BINTI HAJI MOHD. ALI
Tajuk : PERASMIAN KEJOHANAN BOLA JARING KEBANGSAAN KE-6 DAN KEJOHANAN
BOLA JARING BAWAH UMUR 21 TAHUN YANG PERTAMA
Lokasi : PADANG KELAB KILAT LEMBAGA LETRIK NEGARA, KUALA LUMPUR
Tarikh : 18-10-1984

Yang Berbahagia Datin Fawziah Elyas, Pengerusi Jawatankuasa Pengelola Kejohanan Bola Jaring Kebangsaan 1984; Yang Berusaha Cik Norminshah Sabirin, Yang Di-Pertua Persatuan Bola Jaring Malaysia; Dif-Dif Kehormat; Tuan-tuan dan puan-puan sekalian.

Saya merasa amat sukacita dapat bersama-sama tuan-tuan dan puan-puan pada hari ini dalam satu upacara yang saya anggap amat bermakna dalam usaha kita meningkatkan lagi mutu sukan bola jaring.

2. Saya juga ingin merakamkan ribuan terika kasih kepada Pengerusi dan Ahli-Ahli Jawatankuasa Pengelola Kejohanan di atas penghormatan yang diberikan kepada saya untuk merasmikan Kejohanan Bola Jaring Kebangsaan Yang Ke-6 dan Kejohanan Bola Jaring Kebangsaan Bawah Umur 21 Tahun yang pertama ini.

3. Sukan adalah satu bidang yang penting dalam proses pembinaan negara. Aktiviti-aktiviti sukan akan dapat melahirkan rakyat yang cergas dan berdisiplin yang sentiasa sanggup menghadapi cabaran dalam segala bidang kehidupan mereka.

Rakyat yang seperti inilah yang diperlukan oleh negara yang membangun seperti Malaysia untuk meninggikan daya pengeluaran negara ke peringkat yang paling maksima. Kaum wanita juga tidak terkecuali daripada memainkan peranannya dalam hal ini. Dalam konteks ini langkah yang diambil oleh Persatuan Bola Jaring Wilayah Persekutuan sebagai ahli gabungan Persatuan Bola Jaring Malaysia dengan menganjurkan Kejohanan ini perlu diberi pujian. Hasil daripada Kejohanan ini, saya percaya pemain-pemain terbaik akan dapat dipilih untuk mewakili negara ini dalam Kejohanan Bola Jaring Sedunia yang akan berlangsung di Scotland dalam tahun 1987 nanti.

4. Saya difahamkan seramai 200 orang pemain dan 60 orang pegawai sukan turut terlibat dalam menjayakan Kejohanan ini.

Harapan saya semoga pengalaman di Kejohanan ini dapat mengeratkan persahabatan di kalangan pemain-pemain dan pegawai-pegawai sukan di seluruh negara di samping dapat meninggikan mutu permainan bola jaring di negara kita.

5. Saya juga berharap permainan bola jaring ini tidaklah hanya diceburi oleh beliawanis-beliawanis sahaja tetapi diminati oleh wanita-wanita yang telah berkahwin dan mempunyai anak yang juga patut bergiat cergas dalam permainan ini supaya bola jaring menjadi satu permainan yang diminati oleh semua peringkat wanita yang dimainkan sepanjang tahun.

Tuan-tuan dan Puan-puan sekalian, 6. Akhir kata dengan harapan agar Kejohanan ini akan memberi perangsang kepada pemain-pemain khususnya dan peminat-peminat bola jaring amnya bagi memajukan bola jaring di negara ini, maka saya dengan sukacitanya merasmikan Kejohanan Bola Jaring Kebangsaan Yang Ke-6 dan Kejohanan Bola Jaring Kebangsaan Bawah Umur 21 Tahun 1984 Yang Pertama.

Terima Kasih.